



D. O. M.
 THESES ANATOMICÆ
 ET
 CHIRURGICÆ.

EX ANATOMIA.



ODEM quo vivimus, crescimus, sani vigemus
 motu, eodem turbato læsa fatiscit sanitas, præcep-
 que ruinam sibi molitur corporis fabrica. Quanta
 inde oritur morborum llias, quanta inde ingruit
 malorum caterva! Hinc imminuto & languente
 sanguinis circuitu, languent & contabescunt cor-
 poris functiones; aucto & nimium properante, inordinatè concitatur
 Œconomia animalis; per minutissimas vasculorum ambages velocius
 impelluntur liquores; ibi mox hærent, stagnant, morâ varias for-
 mas, prout hunc vel illum exitum meditantur naturæ vires, subituri.

Inter morbos frequentius sævit Inflammatio ; licetque omnes tum internas , tum externas infestet corporis partes , attamen de ipsâ dicturi , integumentorum communium Anatomem tantum scrutabimur.

INTEGUMENTA communia, plura licet ab Antiquis laudata ; duo tantum numerantur , Cutis , & membrana Adiposa. Exterior illa , texturâque validior totum corporis habitum tegit pro variis partibus modò densior , modò rarior ; hæc gracilior & interior priori substernitur.

QUADRUPLEX partium serie constari Cutim volunt recentiores Anatomici. Prima & interior , cæteris crassior , multiplici vasorum genere perfusa , mirando fibrarum varii generis ordine intertexta , extensionis & contractionis capax , Corii sive Cutis nomen tenuit.

EXTERIUS cuti assurgunt Papillæ , ab expansione nervorum cutis oriundæ , hinc villosæ , illæ Pyramidales , imò pro variis locis variæ , in lingûa , Mammæ Papillæ , apice digitorum &c. sublatæ. Cuticulâ , conspicuæ , dantque corpus Papillare dictum.

SUBSTANTIA circumdantur Papillæ molli , mucosâ , tenacitamen , reticulatim dispositâ , variè configuratâ , tot foraminulis quot assurgunt Papillæ pertusâ , illas transmittente , firmante , ordinante , Cuticulæ firmiter adhærente : hinc tertia pars , corpus Reticulare seu Mucosum à Malpighio nuncupata.

QUENAM sit natura hujus-ce partis , nondum probè elucidatum ab Anatomicis , dubiumque manet. Hanc nervorum exuviis natam existimant alii (a) ; alii fibrillis per cutis exteriora excurrentibus diversimodè intertextis constari volunt (b) ; hanc autem ab extremis minutissimorum capillarium propaginibus hinc inde perrepantibus efformari vero propinquum arbitratur clar. Winslowius (c). In hoc corpore positam esse nigredinem Æthiopum uno ore satis fatentur : an à peculiari partium dispositione ? an à specifico quodam humore per illud corpus disperso pendeat ? disquirant curiosi rerum Physicarum indagatores.

(a) Vid. Boerrhaavii Inst. Medic. n°. 418.

(b) Vid. Mangeri Theatrum Anatomicum Lib. 1°. Cap. 2°.

(c) Vid. Winslow Exposition Anatomique , Traité des Tégumens.

EXCEPTA Unguium regione, exterius cæteras super expanditur quarta cutis pars, per loca quædam, interiùs reflexa; Cuticula seu Epidermis vocatur. Illa vasis, fibrisque constans nullis, squamis minimis, sibi mutuò adhærentibus coadunatisque constituit membranam tenuem, plus minùs-ve pellucidam, innumeris perforatam poris, partibus subiectis per vascula tenuissima annexam, ab illis tamen faciliè solvendam, nulloque sensu donatam.

CUTICULA exterius in sulcos areasque, in apice digitorum spirales maximè que spectabiles, exsculpta; facie verò interiori post avulsionem quasi villosa, ab humore Papillarum exudante, pulposisque fibrillarum extremis simul concretescentibus originem suam mutuari videtur. Ipsam à solâ aëris siccitate, fictitiâque vi ipsius coagulante, non esse repetendam plurima evincunt argumenta.

IN totâ cutis extensione passim disseminantur glandulæ minores, sebaceæ dictæ, humorem unctuosum, crassiores, vermicularim concretescentem, morâ nigricantem secernunt, minimisque osculis eructant, cuti leniendæ, laxandæ idoneum.

CONTINUO vasorum motu exhalari liquorem subtilissimum demonstrant observationes Sanctorianæ; hinc, præter foramina omnibus non ignota, minoribus Cutis perforatur foraminibus; hæc Pori generatim nuncupatur triplicis generis distinguendi. Majores alii Pilis transitum præbent, alii minores Perspirationi & Resorptioni dicantur; hi, Pori arteriosi & venosi meritò habeantur. Deducendum inde quomodò fiant Perspiratio & Resorbtio experientiâ faciliè demonstrandæ.

PRÆTER varias cutis Areolas, annotandi sunt ipsius sulci profundiores qui vel à cutis connexionibus, vel à musculis suppositis, vel à peculiari textûs cellularis conformatione repetantur.

E Cute, totidem quasi appendiculæ, prodeunt Pili & Ungues, de quibus hîc, ut potè nostro proposito minùs necessariis, tacere juvat.

INVOLUCRUM corporis commune non tantum dat Cutis, sed evadit tactûs organum variè pro variis partibus distinguendum. Tactum moderatur cuticula, quâ sublatâ sequitur sensatio molesta, densiore factâ enervatur deperditurque tactus.

ALTERUM tegumentorum commune dat membrana Adiposa valdè extensilis, plurimis constans cellulis membranaceis, variæ magnitudinis, inter se mutuò communicantibus. Infrà cutem non tantùm expansa, ad interiores etiam usque corporis partes progreditur, in ipsismet visceribus nonnullis observanda.

IPSAM perreptant plurima vasa sanguifera, ad folliculos appellentia, unde prodeunt ductus peculiare quibus secernitur humor oleosus, defendendis, lubricandis, inungendis musculis partibusque vicinis, & ad motum conciliandum idoneus.

E X C H I R U R G I A.

PARS corporis quæcunque calore intenso, molesto, duritie affecta, dolens, rubens, tumens, pulsans, cum motu febrili vel in toto vel in parte, Inflammata dicitur; isque status Græcis φλέγως, Latinis verò, à sensu ignei caloris, Inflammatio nuncupatur: hinc, ut patet, omnibus cognita ejus indoles faciliùs describitur, difficiùs definienda.

SANGUINIS rubri arteriosi in minimis canalibus stagnantis pressio, & attritus à motu reliqui sanguinis moti, & per febrim fortius acti Inflammationis nomine insignitur à celeberr. Boerrhaavio (a). Obstructionem cum febre vel in toto vel in parte, hanc vocat clariss. commentator Van-Swieten (b). Denique ab excessu caloris à violento arteriarum motu excitato in humoribus, sive illi humores stagnent in parte, ut in Phlegmone, sive liberum obtineant circuitum, ut in Febre, inflammationis naturam repetit Doctissimus Quesnay (c).

IN propriis vasis stat sanguis, vel vi majori impulsus minorum vasorum subit oscula; ergo inflammationis sedes in extremis

(a) Vid. Aphor. Boerrhaavii de cognoscendis & curandis morbis. Aphor. 371.

(b) Vid. Commentaria in Aphorismos. Ibid.

(c) Consul. Lib. cui titulus; *Traité de la Suppuration purulente*, Chapitre ij. à M. Quesnay hujusce Collegii Magistro, nunc primario Regis Medico ordinario, necnon à consultationibus.

arteriarum propaginibus, vel in lymphaticorum arterioforum origine.

PRO variâ inflammationis naturâ, sede, extensione, inflammationis petenda diversitas; hinc quomodò in Phlegmonem vel Erysipelas abeat, & quânam sit genuina ipsius à Phlegmone, Erysipelate, Œdemate, Schirro, aliisque tumoribus differentia faciliè liquet, de quibus tamen hîc dicere nostri non est propositi.

QUACUMQUE de causâ plus æquò aucta arteriarum actio inflammationis causâ proxima statuatur. Hanc promovent plurimæ causæ remotæ tùm internæ ut nimium vasorum robur, Plethora, fluidorum inspissatio aut prava diathesis &c. tùm externæ ut acrida ingesta vel applicata, frigus acre, calor nimius, ligaturæ & compressiones, ustiones, aliæque quàm plurimæ.

INFLAMMATIONEM indicat plurima symptomatum series, nempe tumor, dolor, calor, durities renixusque partis, quibus frequentius accedunt febris, sitis, capitis dolores, somnus turbulentus, vigiliæ, debilitas. Quæ in internis sedibus locum obtinet, diversimodè pro variis partibus cognoscitur. A parte affectâ, morbi causâ, velocitate, & extensione, constitutione ægri, symptomatibus, repetenda Prognosis.

UNDE oriantur accidentia? quomodò augeantur? ex mutata partium mechanicâ deducendum.

A fluidorum per vasâ libera velocitate auctâ frequentiam pulsûs, calorem, & æstum repetant alii; nos verò hæc, à motu arteriarum vicinarum aucto quidem, fluidorum verò, propter mollem excedentem, motu imminuto sed ex eâdem causâ in vasorum parietes nimis urgente, repetenda censemus.

SUA sunt inflammationi tempora; principium nempe, incrementum, status & decrementum, illaque modò citius, tardiùs modò percurruntur, in sanationem, alium morbum, vel mortem exitura.

VARIUM obtinet finem inflammatio, variasque æmulatur formas; hinc, si obstructio sensim solvatur, Resolutio; si humor stagnans in Pus abeat, Suppuratio; si, sævientibus accidentibus,

fiat mors partis. Gangræna; si denique, effluente liquido subtiliori, materies impacta crassior evadat, Schirrus. Hos exitus, suppuratione exceptâ, consultò omittimus, aliisque discutiendos remittimus.

PRO diverso inflammationis statu diversæ indicationes curatoriar. His ritè licet, quando vitanda indicatur suppuratio, observatis sæpè minùs feliciter cedit humor parùm obsequiosus; unde major fit obstructio, motus augetur, ingravescunt symptomata, vasa distendantur, dolore, calore, pulsatione, tumore auctis, suppuratioque citior, tardior-ve pro variâ morbi indole expectanda.

QUOMODO perficiatur Suppuratio, non facilè enucleandum. Hanc Fermentationis opus credant otiosi, parùmque accurati rerum æstimatores. Sanguinem ex vasis ruptis emissum, & extrâ vasa quiescentem in pus verti cum Platnero non arbitramur (a). A majori arteriarum in humores motu suppurationem oriri ratione & experienciâ meliùs probatur; unde si, auctis accidentibus, urgenteque motu, vasa distenta rumpantur, liquores effusi mutatique, solidis teneris attritis permixti dant humorem, album, spissum, glutinosum, æqualem, pinguem, Pus dictum.

EX modò dictis legitimi puris, suppurationisque purulentæ indicia; sin contrâ, pus spurium & malæ notæ, suppuratioque putrida judicantur.

TEMPORA suppurationis diversis signis dignoscenda. Tensio major, dolor vehemens, caloris acrioris, necnon pulsationis sensus cum febre comite, suppurationem futuram; tumor mole major, in summo tamen paululùm mollescens, vasorum distensio, calor urens, pulsatio, horrores, dolores, sitis, auctaque accidentia, suppurationem præsentem fieri; doloris, tensionis, caloris, pulsationis, febris remissio, partis mollities, contenti fluctuatio, tumoris vertex prominens & mollior, factam suppurationem docent; unde verum cecinere scriptores:

Durities, pulsus, rubor, & dolor, & calor aucti
Signant pus fieri, sed factum dicta remissa.

(a) Vid. Institutiones Chirurg. Platneri. de Inflammatione §. 45. Huic quoque sententiæ, sed perperam, favere videtur Dom. Fizes in libro: *Essai sur la Suppuration des parties molles*, Prop. 2.

7

In quibusdam corporis partibus, instituta licet suppuratione, non remittunt accidentia; hinc pro varia partium texturâ, malique sede difficilè debellanda difficiliùs cognoscitur facta suppuration, hinc etiam varia prognosis.

VARIIS suppurationis temporibus, varia competit curandi norma; unde 1°. Si Resolutio obtineri nequeat, & adsint suppurationis futuræ signa, crudus humor maturandus, coctio promovenda; 2°. Illâ præsentè, Abscessus formatur, collectio puris stimulanda; 3°. Illâ factâ, exitus puri conciliandus; 4°. Partis purgatio, deterfio, cicatrixque obtineantur.

A motu majori arteriarum, moderatè tamen excitato, pendet suppuratio legitima; ergo in primo morbi tempore vicem adimplebunt suppurantia simplicia, coctionemque promovebunt: si major reperiatur in parte motus, topica suppurantia & emollientia applicanda; si elanguescat, irritantia adhibeantur.

AUCTIS accidentibus, si vasa distenta rumpantur, liquorisque quidpiam effundant, tunc ad rumorem emolliendum, humorisque coctionem absolvendam præstò sint maturantia modò fortiora, modò debiliora.

Ex signis suppurationis factæ absolutæ coctionis patet Diagnossis. Tunc Abscessus nomen mutuatur morbus, pusque quantum licet maturum, tardiùs aut citiùs evacuandum; pro variâ enim partium structurâ, nunc in celeritate, nunc in morâ periculum.

NON unâ eâdemque methodo exitus puri conciliandus. An totum opus naturæ committendum, donec eruptâ cute pus foras prodeat? an ex causticis petenda curationis præsidia? an in quocumque casu ferrum anteponendum? Primum Muliercularum placitis apprimè convenit: alterum, ex inani metu ferrum repudiante, quâcumque datâ occasione extollant & adhibeant Empirici causticorum jactatores: ferro semper utantur creduliter qui, manibus tantùm confidentes, auxilia variare nesciunt. Chirurgum prudentem, medendique scium decent omnia hæc media, ex iis nullum ipsi videbitur noxium & inutile, sapiensque modò unum, modò alterum, ad artis decus ægrique salutem, non minùs doctè quàm feliciter adhibebit.

ABSCESU aperto, pure evacuato, curatio suppurantibus, digerentibus, deterfivis, exsiccantibus absolvenda.

CÆTERUM pro variis morbi temporibus, causis, & ægri naturâ, Victûs, remediorumque internorum rationem variè instituímus.

De Limoges Has Theses, DEO JUVANTE & Præside M. TUSSANO BORDENAVE, Artium & Chirurgiæ Magistro, Scholarum Professore Regio, tueri conabitur ISAACUS GOURSAUD, Lemovicensis, Artium Liberalium Magister.

PARISIIS,
IN REGIIS CHIRURGORUM SCHOLIS.

Die Lunæ 13^a. Augusti à sesqui-secundâ post meridiem
ad Septimam. Anno Domini 1753.

PRO ACTU PUBLICO,

ET

MAGISTERII LAUREA.

Typis DELAGUETTE Regii Chirurg. Collegii
Typographi. 1753.